

李文忠公全書

奏稿

李忠節公奏議卷九

奏臺莊營參將員缺緊要揀員擬補摺

光緒二十一年七月初三日

奏爲陸路參將員缺緊要揀員擬補籲懇

特旨允准以裨地方

恭摺仰祈

聖鑒事竊照臺莊營參將張福興因積勞歿於防次

經臣奏請從優議卹奉

旨著照所請該部知道欽此仍又循例

恭疏

題報開缺聲明遺缺容臣揀員請補在案伏查此缺係陸

路題補第三輪第一缺輪用儘先人員該參將駐紮嶧縣臺莊轄

境遼闊水陸交衝且與江南徐海處處毗連盜賊鹽梟出沒靡常

本年春間因海防戒嚴該處土匪即思乘隙蠢動雖經東豫江南

三省會合搜捕首惡多已殲除而伏莽總未盡絕目前操防巡緝

迥異平時必須精明幹練熟悉情形之員方足以資控馭臣於儘先候補參將內逐加遴選惟查有副將銜儘先補用參將沙明亮現年四十六歲山東荷澤縣人由世襲雲騎尉歸標學習期滿因緝捕防河出力歷保至遊擊儘先補用復因堵築歷城縣西紙坊河堤合龍出力經原任撫臣張曜奏保免補遊擊以參將留於山東儘先補用並加副將銜經兵部議准覆奏於光緒十六年二月二十日奉旨依議欽此該員勤幹勇敢盡力河防緝捕迭次派委要差均能相機應變措置裕如而於省南邊隘情形尤爲熟悉實候補將領中最爲出色之員以之請補斯缺必能振作有爲雖儘先名次稍後而名次在前之呂奎嚴永興曲廷貴劉魁尤富

麟李榮慶李聯功張文彩俱於此缺人地不甚相宜例得據實聲
明惟籍隸本省與例稍有未符然當此時事多艱需才孔亟臣爲
缺擇人起見未敢拘泥常格致滋貽誤相應籲懇 天恩俯念員
缺緊要准以副將銜儘先參將沙明亮補授臺莊營參將洵於地
方營伍有裨並求 特旨俯准一俟軍務大定內地盜匪斂跡閭
閻敕安容臣隨時奏明再與鄰省揀員對調以符定制如蒙 俞
允仍先送部引 見恭候 欽定謹會同兗州鎮臣田恩來合詞
恭摺具 奏伏乞 皇上聖鑒訓示謹 奏 光緒二十一年七
月二十日奉 硃批著照所請兵部知道欽此

奏東省新海防捐輸銀兩請暫免提解摺

光緒二十一年七
月初三日

奏爲山東省新海防捐輸銀兩仍請留用暫免提解以濟餉需而
維大局恭摺仰祈 聖鑒事竊查前准戶部咨山東本省新海防
捐輸自六十一次起烟臺新海防捐輸自第四十七次起所收捐
項均應全數改解部庫不准留用等因分行知照在案茲據總辦
新海防捐輸局務署布政使李希蓮詳稱東省新海防捐輸銀兩
曾經前撫臣張曜分別 奏咨截清卯數凡光緒十六年十一月
初二日以前收款業已掃數解清其自十六年十一月初二日以
後收款儘數留作修建沿海礮臺之用按次造冊咨報核准照辦
惟因上年倭人敗盟軍務喫緊始將臺工停止即行籌辦海防屢
次募勇增營購炮置械並添大枝勁旅遠調各省客軍自去秋以

迄於今未經請撥部款並非東省庫力尙充半由捐輸有以濟之
現在雖已停戰而沿海千數百里仍未敢一日弛備海防各營需
餉甚鉅本年京協各餉僅准截留一半統籌兼顧約計不敷尙多
庫款搜括無遺全賴前項捐輸稍資挹注若責令全數改解部庫
何異扼其吭而絕其食必致無米爲炊大局所關非細矧山東爲

京畿門戶唇齒之顧不容稍疏部臣亦知東省爲難情形議准
截留京協各餉案內聲明司庫正賦出入相抵不敷供億且附近
北洋已有戰事與東南沿海各省僅籌防堵者不同所有山東本
省新海防捐輸第六十一次起烟臺新海防捐輸第四十七次起
以後所收捐項均請仍准留用暫免提解藉供海防軍需他省不

得援以爲例等情詳請 奏咨前來合無仰懇 天恩俯念東省
庫款奇絀萬分爲難准將所收新海防捐輸銀兩仍舊留用暫免
提解以濟餉需而維大局出自 逾格鴻慈除咨部查照外理合
恭摺具陳伏乞 皇上聖鑒訓示謹 奏 光緒二十一年七月
二十日奉 硃批戶部議奏欽此

奏報黃河秋汎情形摺

光緒二十一年七月初五日

奏爲黃河秋汎盛漲險工迭出上游南岸壽張縣屬之高家大廟
大隄坍塌過水下游南岸齊東縣屬之北趙家大隄漫溢成口謹
據實恭摺馳陳仰祈 聖鑒事竊查利津縣呂家窪黃河伏汎漫
溢經臣於六月二十二日 奏報在案入秋以後水勢日見增漲

迭淮河臣許振禕來電萬錦灘於六月十八十九等日長水六尺二十四日又長水四尺據上中下三游總辦稟報連日伏汎未消加以霪雨兼旬黃河挾山河併注之水奔騰澎湃怵目劇心各工段奇險迭生爲近數年所罕見如上游北岸之萬家橋一帶水溢出槽順臨黃隄西趨至馬家窪漫過民埝直衝影塘其由廖家橋至馬劉莊五十餘里民埝全行冲塌水抵隄根深五六尺及丈餘不等南岸黃花寺張樓柏莊等處水浸大隄該處距河身十七八里隄外附近沮河因向無險工歷年並未存儲料物該防營斫伐柳枝懸挂廂護奈隄身兩面皆水均已浸透於二十二日由高家大廟坍塌數丈漫水直注河復東南至梁山安山一帶仍入黃

河中游北岸之董家寺豆付窩五里鋪李家岸北灤口倪家莊南岸之韓家道口楊莊大寨等處埽壩迭報蟄陷各營委晝夜搶廂尙未疎失至下游河身愈窄兼以海潮頂託出海尾間不暢故險工較上中兩游更多自濟陽灰壩而下如葛家店直河桑家渡清河鎮大馬家大田家宋家集東劉家北鎮打魚崔家均埽走隄塌岌岌可危十六日利津南岸南嶺迤下民修民守之子埝坍塌過水刷成口門五十餘丈該處地勢較高尙未奪溜北岸利津迤下之趙家菜園因南風過大逼溜北趨一夜將隄頂塌盡勇夫極力搶護而隄身本屬沙土一經抽掣立見蟄陷新挖之土半多泥漿旋搶旋塌現已飛調鐵門關海防各營赴工併力搶築能否搶固

尙無把握二十日齊東縣境之北趙家因齊東舊城被水沖塌溜
由齊東南門奔騰直注又值風雨交加勇夫搶護不及致隄身刷
塌數十丈水由青城南趨其餘各處險工尙在極力搶護據該總
辦等先後稟報前來臣查本年水勢較之十八年盛漲之時猶高
至二尺以外自閏五月下旬至六月一月內幾於無日不雨平地
水深數尺各工段所有著名舊險不計外又連出新險數十處當
疾風暴雨之際僅恃此一綫危隄以捍驚流急湍之水誠屬勢處
萬難上游總辦亮沂道姚協贊已奉 旨調補陝西糧道接辦上
游河工候補道李清和甫經到工應請免其參處下游總辦候補
道丁達意自去冬籌辦海防勤勞倍至本年接辦河工正值萬分

棘手衝風冒雨奔馳於泥淖之中實屬不遺餘力惟既身任總辦責無可辭應請 旨交部議處上游南岸防營候補參將劉福寶下游南岸防營候補遊擊李金書承防之候補知縣湯宗幹分防候補典史潘名彥雖係地廣人單究屬疏於防範應請一併交部議處臣未能駐工督率前於呂家窪漫口摺內 奏請交部議處在案此次失事仍應請 旨將臣交部議處除飭確查高家大廟漫水果否未向南趨並將北趙家漫口盤築裹頭免致續塌一面查明被淹災民妥籌賑撫外所有秋汎險工迭出上游高家大廟大隄坍塌過水下游北趙家大堤漫溢成口緣由謹繕摺由驛馳奏伏乞 皇上聖鑒訓示再臣前奉 諭旨回省於六月二十

五日由萊州啟程沿途爲雨水所阻其水深無舟楫之處文報亦不能通茲於七月初四日始抵濰縣此摺係在濰縣拜發合併陳明謹 奏 光緒二十一年七月十五日奉 硃批另有旨欽此

奏請將買料不實人員革職片

光緒二十一年七月初五日

再河工修防全重稽料東省舊章以一萬斤爲一垛必須購買之員斤重足數方足以收實用查山東河工積習率以買料爲調劑之差架井空虛任意短少甚至有不肖委員於大汎之際通同防營捏稱隨買隨用實并未買一束料價全飽私囊糜帑誤工殊堪痛恨臣習聞此弊嚴飭各總辦於買料委員諄諄告誡不啻三令五申乃訪聞下游委員候補同知邵守正中游委員候補巡檢崇

貴買料均未能覈實復派員過秤查驗皆不足數臣維稽料一項無論堵口搶險均屬要需若一垛不足一垛之用必致臨時失措貽誤事機此種惡習實爲河工之蠹若不從嚴參辦不足以挽頽風應請將候補同知邵守正候補巡檢崇貴一併革職以儆效尤以後如查有營委通同舞弊情事即請旨嚴正其罪以昭炯戒謹附片馳奏伏乞聖鑒訓示謹奏光緒二十一年七月十五日奉 硃批另有旨欽此

奏審明越獄盜犯摺

光緒二十一年七月初八日

奏爲審明越獄盜犯同刑禁人等按律分別定擬恭摺具陳仰祈聖鑒事竊查前據平陰縣知縣李敬修稟報斬犯邵立秋越獄

脫逃等情當經前撫臣福潤批司將該典史張開先撤任 奏參

奉 旨這所參疎防監犯越獄之管獄官山東署平陰縣典史試用巡檢張開先着即革職拿問交福潤提同刑禁人等研訊有無鬆刑賄縱情弊按例懲辦有獄官平陰縣知縣李敬修先期公出著准其免議仍勒限緝拿逸犯邵立秋務獲究辦餘著照所議辦理該部知道欽此福潤欽遵行司緝拿一面飭提刑禁人等至省發委濟南府審辦旋據肥城縣知縣王聯庚協同平陰縣緝役營兵並禁卒人等家屬暨張開先派出家丁將邵立秋拿獲訊供稟經福潤批飭提省歸案審辦該典史張開先照例免其拿問茲據濟南府知府魯琪光審明擬議由司覆審解勘前來臣因籌辦海

防出省飭委署藩司李希蓮代審無異經臣覆加查核緣邵立秋即邵晚秋邵立楹均籍隸平陰縣邵立楹與邵立秋同姓不宗俱先未爲匪犯案光緒十八年八月初三日邵立秋邵立楹與素識在逃之鄭衍坪石三即盧漑清遇道貧難邵立秋起意行竊邵立楹與鄭衍坪等允從是夜同夥四人邵立秋與鄭衍坪等分攜洋槍邵立楹攜帶白臘杆偕抵事主王天名家門首邵立楹在外接賊邵立秋等越牆進院撥門入室行竊王天名與母王孫氏驚覺起身喊捕邵立楹聞喊先逃邵立秋起意行強鄭衍坪石三允從邵立秋開放洋槍轟拒致傷王天名右腳踝並將王孫氏推搡致傷額顱一同刦得衣物開啟大門逃走鄰佑王長夏黃秉公追捕

邵立秋與鄭衍坪開放洋槍連轟傷王長夏腦後右肱腋黃秉公額顱至何人轟傷何處部位邵立秋記憶不清追及邵立楹告知強刦拒捕情由將賊分別存留賣與不識姓名人得錢分用各散王天名報經該縣李敬修會營勘訊獲犯邵立楹訊詳審擬解經泰安府知府康敕訊因犯供游移飭取原拿捕役供詞未到將犯飭發回縣研訊續獲邵立秋收入縣監訊供通詳十九年十一月二十八日李敬修赴省面稟地方事宜公出十二月初四日傍晚該典史張開先帶領刑書孫長源進監收封驗明邵立秋刑具完固收入南監木籠交禁卒蕭汝西李茂華看守並派孫長源與營兵徐榮海在監值宿縣役馮克城賈瀾春更夫張學汕任瀾安在

更道支更巡邏飭令小心防範封鎖獄門回署是夜四更時分風雪交作張學汕等進屋避雪孫長源與徐榮海等均因困倦睡熟詎邵立秋乘間扭斷鐐銬揭開籠板鑽出木籠用破門作梯越出監牆由城牆缺口爬出城外逃逸蕭汝西等驚覺報經張開先馳往督拿無獲申經李敬修回署會營勘訊稟經該管道府轉由藩臬兩司詳經福潤將該典史張開先撤任 奏參革職拿問行司將刑禁人等提省發委濟南府知府魯琪光審辦邵立秋逃後在不識姓名剃頭担上薙去頭髮逃往各處躲避二十年二月二十三日經肥城縣知縣王聯庚訪聞邵立秋逃入境內會督營典兵役馳往查拿適李敬修與營汎派出兵役暨張開先派出家丁並